



## 菜脯情

「五月節包 12 斤米有較少兜，你兜一家分無幾多隻，七月半愛包加兜仔。」五月節个粽仔正食啊忒，阿姆就愁到七月半去咧！

今年五月節，佢兜毋肯八十零歲个老衰仔再過包粽仔咧。天氣恁熱，又無人好搵手，就緊話佢用買較了俐，愛鹹愛甜都有，毋使恁辛苦。佢知，一溜來打板分細人仔食，係佢惜子、惜孫个一種方式，這下愛佢改變，佢个心肝肚一定盡艱苦。毋過，這乜係佢兜痛惜衰仔个一種孝心啊！

恁堵好，五月節前電視緊報有菜脯摻防腐劑，對人个身體毋好。阿姆聽著煞煞講：「買个粽仔仰會安心食！用買毋當自家來包，菜脯知總知總，又乜較衛生。」連阿爸就支持阿姆，佢兜就無麼个話好講咧。

在頭擺，菜脯仰使買，逐年冬禾割忒，就會在田竇肚點兜菜頭，到年下擲起來，經過洗淨、切片、滷鹽、石頭砵、日頭晒，幾日仔菜脯就晒好好落盞咧。記得該下个冬下頭盡冷，手必腳必，手一拖用鹽滷過个菜脯就噓噓滾痛。本來還好喋喋搶等去晒，毋過跔阿姆去一擺，後來仰般拐就毋肯再過去咧。晒菜脯雖然多工、艱苦，但係晒出个菜脯拿來煎卵、炒蒜頭米盡香、盡好食，係飯桌頂、飯包肚最常出現个菜。

有一擺，阿姆在明櫃肚搜著兩盞菜脯，係頭過食伸留下來个，一年長一兜，毋多知就有兩盞咧。背尾，田無耕咧，菜脯也無晒咧，就放到毋記得去。這搜著个老菜脯，摻佢老弟同年，有五十零歲咧，毋過，烏金烏金還盡好。前駁仔，佢聽講年分久个老菜脯一斤愛歸萬銀，煞煞轉去摻阿姆講，無想著阿姆就留一滴仔自家用定，伸个早就分隔壁鄰舍你拖一拖、佢撮一撮討去食嗽咧！佢純良个阿姆，在佢心肝肚，情比利較重。

驚又有毒菜脯，七月半阿姆本本愛包粽仔。天時還較熱咧，毋過，這擺佢心肝肚有打算，佢愛轉去跔等阿姆學包，下二擺換佢包分阿姆食。

作者：張美容

### ☆詞彙學習☆

【了俐】liau li+：乾脆。

【好喋喋】hauˋ diaˋ diaˋ：興沖沖。

【一溜來】rhid liu+ loi：一直以來。

【蒜頭米】sonˋ teu miˋ：蒜仁。

【點菜頭】diamˋ coiˋ teu：播蘿蔔種子。

【明櫃】min kui+：明式的木製櫥櫃。

【手必腳必】shiuˋ bid giog bid：手腳皸裂。

【長一兜】diong rhid deuˋ：剩餘一些。

【噓噓滾痛】nagˋ nagˋ gunˋ tungˋ：刺痛。

【食嗽】shidˋ cugˋ：食用以治療咳嗽。

### ☆文法學習☆

【拖一拖】rhaˋ rhid rhaˋ：由動詞及「拷貝動量詞」組成的「V—V」型結構。前一個V代表動詞，後一個V是由動詞變化而來的量詞。例：撮一撮、抔一抔、撈兩撈、捧一捧、抓一抓、攪兩攪、疊五疊。